



Komunikadu imprensa
Tribunál Distritál Dili
04 Agostu 2022

Primeiravés Tribunál kondena arguidu kazu VD ho suspensaun ba pena prizaun ho kondisaun tenke fó alimentasaun kada fulan ba nia oan na'in rua

Iha 15 Jullu 2022, Tribunál Distritál Dili prezide julgamentu ba kazu ofensa ba integriade física simples ho natureza Violénsia Doméstika (VD) no imediata lee desizaun hodi kondena arguidu ho pena prizaun fulan 8 (walu) suspende nia ezekusaun ba tinan 2 (dua) ho dever kada fulan arguidu tenke fó alimentasaun ba nia oan na'in rua. Kazu ne'e envolve arguidu ARG hasoru nia feen, iha Munisípiu Likisá.

“JSMP apresia aas tebes ho desizaun ne'e, tanba pela primeiravés tribunál hatun desizaun ba arguidu ho dever atu arguidu tenke fó alimentasaun ba nia oan kada fulan. Mezmu la indika kuantia/kada fulan hira mak arguidu tenke fó ba nia oan sira maibé desizaun ne'e hatudu ona katak labarik sira nia interese (nesesidade) urjente no la persiza tenke hein ba prosesu sivíl ne'ebé dalaruma presiza tempu kleur atu atribui responsabilidade ba arguidu hodi fó alimentu ba oan sira”, dehan Sra. Ana Paula Marçal, Diretora Ezekutiva JSMP.

Iha Artigu 69 nú. 2(a) Kódigu Penál kona-ba prizaun nia suspensaun ho dever prevee ona katak bele sai hanesan kondisaun ba suspensaun ho dever atu repara ka fó garantia atu repara prejuizu ne'ebé krime hamosu, iha prazu determinadu. Iha kazu konkretu ida ne'e, JSMP konsidera separasaun entre arguidu ho lezada tanba krime ne'e rezulta prejuizu direita ba labarik sira (arguidu no lezada nia oan na'in rua) ne'ebé tenke hetan alimentu no kuidadu husi nia inan-aman, liliu arguidu.

Artigu 104 KP kona-ba responsabilidade sivíl tanba krime mós, prevee katak ofisiozamente tenke apura no fiksa indemnizasaun tanba perda no danu ne'ebé mai husi krime. Iha esperensia balun ne'ebé JSMP nota katak mezmu kazu alimentasaun ba menór ne'e kazu urjente tuir lei sivíl maibé iha prátika kazu sira ne'e dala ruma han tempu kleur tanba menór sira tenke iha dokumentu sertidaun RDTL ne'ebé legalizadu.

Iha kazu lubuk ida ne'ebé JSMP atende, menór sira barak mak hetan difikuldade atu hetan alimentu husi nia aman ka inan tanba de'it sira laiha sertidaun RDTL no atu trata

sertidaun ne'e mós presija han tempu kleur, tanba ne'e ho desizaun ba kazu ne'e, JSMP konsidera apropiadu tanba bele rezolve kestaun krime no sivíl dala ida de'it.

JSMP konsidera desizaun ne'e nu'udar desizaun únika no bele sai hanesan referénsia ba tribunál seluk atu aplika iha futuru ba kazu ho natureza no kondisaun hanesan.

Kazu ne'e rejista ho Nú. Prosesu: 0108/21 LIBZT no julgamentu ne'e prezide husi Juis Dr. Álvaro M. Freitas, Ministériu Públiku representa husi Prokuradór Dr. Claudino do Rosario no arguidu hetan defeza husi Dr. Henrique João Mariss husi Defensória Públiku.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>